




EUKARISTIA: DON NE'EBÉ TRANSFORMA MORIS

TEMPU FORTE KUAREZMA-PÁSKUA 2019

REZUMU



Iha tempu kuarezma ita haka'as an atu kontinua dalan santidade nian ho empenhu espirituál no materiál. Iha dalan atu "Sai santu hanesan Na'i ne'ebé santu" (kf Lv 19,2), mai ita aprende husi foin-sa'e Carlo Acutis oinsá sai ema orijinal no la'ós ema fotokópia iha moris ne'e, hodi hakbesik ba meu sira Maromak haraik no kolabora ho Nia atu bele fó fuan wain.

Prepara husi

Jacinta Gusmão FMA
Komunidade S.Maria Mazzarello-Venilale

EUKARISTIA FORSA IHA DIFIKULDADE SIRA



Leitura Evanjellu: Lc 4,1-13

Indikasaun ba reflesaun



Iha domingu dahuluk kuarezma nian Evanjellu fó sai kona-ba Jezús nia loron 40 iha rai-fuik depoizde Batizmu iha Jordaun: “Espíritu lori Jezús iha rai-fuik iha-ne’ebé nia hela loron 40 no diabu bature nia”. Ne’e mak prova ida iha-ne’e Na’i sai nu’udar ida ne’ebé manán no prepara nia atu haklaken Evanjellu Maromak nia Reinu nian. Kreda halo ita hanoin mistériu ne’e iha inísiu Kuarezma nian tanba nia mak fó perspetiva no signikadu tempu nian, katak tempu ida kombate ka luta espirituál nian kontra Espíritu Aat. Enkuantu ita la’o iha rai-fuik Kuarezma nian, ita hateke ba Páskua, vitória definitiva Jezús nian hasoru Diabu, hasoru sala no mate. Ne’e mak signifikadu domingu I Kuarezma nian: ho modu desizivu ita la’o iha Jezús nia dalan, dalan ne’ebé lori ita bá moris. Hateke ba Jezús, la’o ho Nia no habosu an ho Nia. Jezús nia dalan ida-ne’e liu husi rai-fuik, iha-ne’ebé ita ita mós hetan tentasaun sira. Tentasaun ida-idak haksumik iha ita-nia frakeza sira, ita-nia fragilidade sira no dalaruma hatudu an hanesan buat di’ak eh buat ruma ne’ebé loos... Ne’e mak tentasaun atu halo Maromak serví ita no la’ós ita mak serví Nia. Kuarezma mak tempu atu deskobre hikas katak forsa atu hafunu tentasaun sira mai husi Eukaristia. Eukaristia mak Jezús Kristu nia Isin ne’ebé salva ita, perdua ita no halo ita sai ida de’it ho Aman.

Sasin moris Ven. Carlo Acutis nian

Ema barak mak konsidera Carlo foin-sa’e estraordináriu ida, maski nia moris normál liu, hanesan ho ninia maluk sira ho tinan hanesan. Carlo haka’as an ho domin no paixaun iha atividade hotu ne’ebé karakteriza foin-sa’e sira ho tinan hanesan: família, eskola, estudu, jogu, amizade sira. Bainhira nia hasoru difikuldade ruma nia husu tulun ba Jezús no nia sempre konsege rezolve: “Se iha buat hotu ne’ebé ó hakarak aprende atu halo no , ó haka’aa an no ó halo ho Jezús, entaun fiar bá katak ó sei halo nafatin ho di’ak”. Nia repete beibeik: “Lahó Nia ha’u labele halo buat ida”. Sei tinan hitu hela nia hetan lisensa husi Bispu atu halo Primeira Komuñau no nia hateten: “Sai ida nafatin ho Jezús: ne’e mak ha’u-nia programa moris nian”.




Reflesaun

Sá de’it tentasaun sira ne’ebé impede ita atu la’o ho Jezús?

Ita esperimenta ona katak Eukaristia mak forsa ba ita-nia moris loroloron?

Orasaun no empeñu

“Nia sei fó orden ba Ninia Anju sira atu tau matan ba ó iha ó-nia dalan hotu” (Salmu 91,11).



EUKARISTIA TRANSFORMA ITA



Leitura Evanjellu: Lc 9,28b-36

Indikasaun ba reflesaun



Domingu kotuk liturjia apresenta katak Jezús, iha rai-fuik, hafunu no manán diabu hodu lakohi tuir ninia babeur boboot sira ne'ebé ita-nia bei-ala sira Adão ho Eva no povu ebreu monu durante tinan 40 Ézodu nian. Ohin Evanjellu apresenta mai ita Jezús iha foho Transfigurasaun nia leten, nabilan ho roman Maromak nian. Transfigurasaun mak meta (objetivu) ita-nia dalan Kuarezma nian: ita la'o ba ne'ebá. Loron sira ne'ebé haketak ita husi Páskua bele sai tebes duni dalan interiór loloos ida. Ita bele kompara ho dalan ne'ebé Jezús halo husi Galileia to'o Jerusalém.

Horik ho Nia, akompaña Nia hodi husik Ninia Liafuan sira gia ita, hasoru Nia iha Eukaristia mak modu di'ak liu atu halo buras iha ita Ninia sentimentu rasik.

Evanjellu apresenta ita iha foho ho ninia dixípulu na'in tolu, Pedro, Tiago no João.

Iha-ne'ebá ba momentu ida Nia hatudu ninia glória. Transfigurasaun tulun ninia Diipulu sira no ita mós atu komprende katak Kristu nia Paixaun mak minstériu ida sofriemntu nian, maibé liuliu ne'e mak prezente domin rohan-laek ida husi Jezús mai ita. Mai ita Liturjia Eukarístika mak fatin aas ida Na'i lori ita bá. Ita mós, hodi hasoru nia iha Eukaristia, ita sai nakfilak an, transfigura an. Nune'e, Eukarisria domingu-domingu mak Tabor ida semanál ne'ebé halo ita haree naroman ida oinseluk husi ita-nia ritmu moris loroloron nian. Iha liturjia divina Jezús sai dala ida tan roman ne'ebé leno ita-nia dalan hodi haraik mai ita ninia Liafuan no ninia Isin. Nune'e ita-nia moris sai oinseluk tanba Na'i nia glória moris-hi'as nian transfigura ita.

Sasin moris Ven. Carlo Acutis nian

Husi tinan 12 Carlo la falta ninia enkontru ho Jezús iha Eukaristia, ne'ebé nia hateten nu'udar ninia "dalan [autoestrada] ba Lelehan". Ninia "Hodi simu liután Eukaristia ita sai liután hanesan liután hanesan Jezús no iha rai ne'e ita esperimenta ona lalehan". Nune'e ninia konsellu ida ne'ebé sai segredu atu to'o lalais ba santidade mak ne'e: "Buka atu bá Santa Missa loroloron no halo Santa Komuñan".




Reflesaun

Imi sa'e ona ba foho Tabor iha imi-nia esperiénsia fiar nian?
Saida mak ita presiza atu sae ba foho Tabor?

Orasaun no empeñu

"Imi buka Ha'u-nia oin!". Ita-nia oin, Na'i, ha'u buka. Ita mak ha'u-nia tulun, Maromak ha'unia maksoin (Salmu 27,8.9b).



EUKARISTIA KONVERTE ITA



Leitura Evanjellu: Lc 13,1-9

Indikasaun ba reflesaun



Iha pasu Evanjellu nian, Jezús hodi refere ba akontesimentu krónaka nian (romanu sira ne'ebé hanehan iha Templu laran no trajédia vítima 18 ne'ebé Torre Siloé hanehan) nia haktuir ai-kanoik kona-ba ai-figeira ne'ebé la fó fuan. Nia hakarak evidensia liuliu “aspetu foun” ida kona-ba Maromak, Maromak ne'ebé domin no laran-sadia. Ai-kanoik iha mensajen rua: husi sorin ida patraun ne'ebé, haree katak nia la hetan ai-fuan husi ai-hun, dehan ba to'os-atan atu tesi tiha; husi sorin seluk patraun ne'ebé, rona tiha atan nia hapara desizaun atu tesi, hodi hein atu fó fuan. Ai-kanoik ninia sentru konvida ita atu hanoin hikas ita-nia modu moris nian, ba mudansa ita-nia moris nian, basá Na'i hakarak ita-nia konversaun. Konverte signifika troka atitude, orienta hikas ita-nia moris no koko haree sasán sira hanesan Nia haree. Konsiste iha esperimenta dala ida tan Na'i nia di'ak oinsá no buka mahan iha Nia. Konverte hakarak dehan deskobre Maromak ne'ebé hadomi ita, Jezús ne'ebé mate mai ita, husik mai ita don Eukaristia, kbiit ne'ebé tulun ita troka ita-nia moris no halo atu ita-nia “ai-figeira” fó fuan. Defaktu, Jezús iha pasiénsia, tau matan mai ita no tulun ita atu ita fó fuan. Se ita hateke ba ita-nia moris pesoál, ita bele haree oinsá Maromak iha nafatin pasiénsia rohan-laek mai ita, maski ita iha limite oioin.

Sasin moris Ven. Carlo Acutis nian

“Konversaun la'ós buat seluk maibé muda ita-nia hateken husi kraik ba Leten; natón de'it movimentu ida matan sira-nian”. Carlo dehan katak ita presiza nafatin orienta ita-nia vontade ba Maromak no ba buat sira ne'ebé haksolok Maromak. “Presiza halo ézodu husi salan ho firmeza. Sá loos benefísiu ba ema ida manán funu rihun ida se nia la iha kbiit atu manán nia an rasik?”.




Reflesaun

Saida mak ha'u sei muda iha ha'u-nia moris?
Sé no saida mak tulun ha'u atu halo mudansa ne'e?

Orasaun no empenhu

“Na'i laran-luak no laran-sadia, boot iha domin. Na'i nia domin ba nafatin ba sira ne'ebé rai ninia aliansa (Salmu 103,8.17a.18a).”



EUKARISTIA MAK DOMIN



Leitura Evanjellu: Lc 15,1-3.11-32

Indikasaun ba reflesaun



Liturjia domingu ida-ne'e nian apresenta ai-kanoik Aman ne'ebé laran-luak. "Mane ida iha oan na'in rua": nune'e mak istória hahú. Ita husu tanba sá Jezús uza espresaun ida-ne'e. Tema prinsipál ida husi ai-kanoik ne'e: oan na'in rua ne'ebé la komprende oinsá Aman nia domin boot ba sira. Oan na'in rua, ida boot no ida ki'ik, karákteer no temperamentu lahanesan, modu rua lahanesan atu relasiona no atua. Loron ida ida ki'iksai husi uma, buka nia an rasik, buka ksolok. Ba nia uma kloot ona, aman no maun la to'o ona. Nia buka ksolok iha sasán sira, maibé nia sai konxiente katak sasán sira buat mamuk ida. Ninia rebeliaun mak inísiu ida ba deklarasaun domin nian. Dala hira mak ema ne'ebé rebela sente falta domin nian no buka. Nune'e nia tama iha nia an rask, la'ós tanba domin maibé tanba hamlaha no hahú dalan fila fali ba Aman nia uma. Ba Maromak la importa motivu tanba sá ita hahú halo viajen. Ba Nia natsufisiente katak ita halo ain-hakat dahuluk. Ema la'o, Maromak halai. Defaktu, Aman, haree nia husi dook. Halai ba hasoru nia no perdua nia ho domun boot no laran-luak: molok nia oan lokeibun, halo festa ba nia. Oan boot ne'ebé, fila husi to'os, hetan uma ho festa ba nia alin ne'ebé fila, nia lakohi tama. Maibé Aman bá hasoru mós nia no insiste atu nia tama. Defaktu Aman ne'e halai ba hasoru sira na'in rua hotu tanba nia Aman di'ak. Sentru ai-kanoik nian mak Aman, nia ne'ebé hadomi, perdua no simu. Ai-kanoik nia mensajen mak oinsá mane na'in rua simu bolun atu hadomi. Ita tenke sai laran-luak no iha pasiénsia hanesan Aman. Don Eukaristia nian ne'ebé Jezús halo mai ita bele fó kbiit iha dalan ida-ne'e.

Sasin moris Ven. Carlo Acutis nian

«Jezús mak domin no hetok ita habosu an ho Nia, ne'ebé sai han-hemu mai ita liuhusi Eukaristia, ne'ebé iha nia isn rasik, nia raan, nia klamar no divindade, ita aumenta tan ita-nia kapasidade atu hadomi [...] Eukaristia sei halo ita hanesan ho modu úniku ho Maromak, ne'ebé Domin». Nune'e, Carlo moris ho modu intensu domin ba nia kolega sira ba labarik sira katesizmu nian, ema kiak sira iha "meza Caritas" nian, labarik sira oratóriu nian. Iha almosu nia prepara kontentór atu tau hahán ba ema sira ne'ebé la iha uma. Nia la gasta osan arbiru mai rai hamutuk atu sosa "sleeping bag" [saku atu toba] ba ema ne'ebé la iha uma ka fó ba Caritas.




Reflesaun

Sá loos mak ilas Aman Maromak nian ne'ebé ha'u iha husi ki'ik?
Ha'u identifika ha'u-nia an ho oan ida-ne'ebé?

Orasaun no empeñu

"Maromak mak domin; ema ne'ebé horik iha Domin nia horik iha Maromak no Maromak horik iha nia" (1Jo 4,16b).



EUKARISTIA MAK HUN PERDAUN NIAN



Leitura Evanjellu: Jo 8,1-11


Indikasaun ba reflesaun



Pasajen ohin nian haktuir hani ida eskriba no farizeu sira tau ba Jezús. Hodi fó razaun atu hatene Jezús niniaopiniaun kona-ba feto ne'ebé halo sala adultériu, sira tau Jezús iha pozisaun desconfortavel, hodi obriga Nia atu hili entre respeitu lei no mizerikórdia ne'ebé Nia haklaken. Iha hani ne'e nia laran, Jezús uluknanai refleto, la hatán, nonok no hahú hakerek ho nia liman-fuan iha rai. Karik nia halo dezeńu, hakerek, hanesan iha tiha fatin seluk. Maibé tanba sira insiste "ó dehan saida?", Jezús hatán: "imi ida ne'ebé lahó sala, tuda imi-nia fatuk dahuluk hasoru nia". Sira ida labarani dehan katak sira laiha sala. Ita ida-idak iha tentasaun atu sai akuzadór/a, dalabarak ho modu la konxiente. Jezús la permite atu uza Maromak nia lei atu kondena maluk, bainhira ema ne'ebé kondena nia sala-na'in ida. Epizósiu ida-ne'e revela katak Jezús mak roman ne'ebé halo lia-loos nabilan. Defaktu, Jezús husu ba feto adúltera: "Feto, sira iha ne'ebé?": ninia liafuan sira ne'e no ninia matan nakonu ho mizerikórdia halo feto ne'e sente, karik ba dala uluk, katak nia iha dignidade, katak nia bele muda moris no la'o iha dalan foun. Modu ida forte atu halo eventu perdaun nian kleur iha rai mak Eukaristia. Eukaristia mak memória perdaun nian no fó hanoin mai ita Jezús iha Krús, iha nia oras mate nian, propoin perdaun nu'udar prinsípiu moris nian. Euukaristia eduka ba perdaun. Paun Eukarístiku fó forsa grasa nian atu bele perduia. Atu bele perduia presiza iha fuan boot no mizerikordiozu.

Sasin moris Ven. Carlo Acutis nian

Ba Carlo santidade mak kondisaun atu to'o ba meta. "Ita-nia meta tenkeser infinitu, la'ós finitu. Infinitu mak ita-nia Pátria. Maromak hein ita horiuluk kedas iha Lalehan". Nia mós hateten: "Ema hotu moris nu'udar orijinál maibé barak mate nu'udar fotokópia". Atu orienta ba Meta ida-ne'e no la "mate nu'udar fotokópia" Carlo hateten katak ita-nia Búsola tenkeser Maromak nia Liafuan atu konfronta ita-nia moris. Liuliu Sakramentu sira: Eukaristia no Rekonsiliasaun. Nia konfesa ho modu frequente tanba «konfisaun hanesan ahi ne'ebé halo sae balaun-gas. Atu nia sae ba leten presiza hasai todan sira, nune'e mós klamar atu sae ba Lalehan presiza hasai mós todan ki'ik-oan sira ne'ebé hanaran sala veniál. Se karik iha sala mortál ida, klamar monu ba rai no konfisaun hanesan ahi ne'ebé halo balaun-gas sae ba lalehan».



Reflesaun


Ita konxiente katak ita mós ema maksalak?

Ita konsege atu la julga ema, maibé prontu atu perduia?

Orasaun no empenhu

"Rahun-di'ak ba ema ne'ebé Na'i halakon nia sala" (Salmu 32,1a).

"Ema ne'ebé aat konverte an bá husi hahalok aat no ó sei moris" (Ezequiel 33,11b)



EUKARISTIA KATAK SIMU JEZÚS



Leitura Evanjellu: Lc 23,1-49

Indikasaun ba reflesaun



Ho Domingu Ramos ita tama iha semana importante liu Tinan Litúrjiku nian: Semana Santa. Lucas apresenta mai ita Jezús ne'ebé tama iha Jerusalém la'ós ho modu privadu hanesan iha okaziaun barak nia halo, maibé hodi manifesta ninia identidade Messias nian. Eskolante lubun-boot haklaken nia liurai, nakonu ho ksolok. Sidade ne'ebé simu nia ho festa mak sinál ida ba entrega an resíproka: povu entrega an ba Jezús no Jezús ne'ebé entrega an ba povu noa aseita sira-nia entuziazmu. Jezús moris ba povu: povu ne'ebé haklaken ka povu ne'ebé kondena nia, ba sira Jezús moris no mate, ba sira-nia salvasaun. Defaktu, liturjia halo ita rona istória Jezús tama iha Jerusalém no ninia Paixaun. Tau hamutuk testu rua ne'e halo ita komprende sá loos ukun ne'ebé Na'i hakarak lori ita bá. Nia la'o iha ita-nia oin atu ita simu Nia ho ksolok no tuir nia iha dalan hanesan. Iha sirkunstánsia sira moris nian, ih adifikuldade no iha esperansa, iha terus no iha ksolok. Maibé oinsá simu Nia? Hodi habosu an ho Nia iha Eukaristia, tau Nia iha "ha'u" nia fatin. Iha Eukarisita Jezús, hanesan halo ho dixípulu Emaus nian, la'o ho ita atu fó konsolasaun mai ita iha prova sira no tahan ita iha moris loroloron nian.

Sasin moris Ven. Carlo Acutis nian

Carlo nia moris mak moris eukarístika ida: nia la hadomi no adora Jezús nia Isni ni Raan, maibé simu nia iha aspetu oblativu no sakrifikal. Husi Mistériu eukarístiku nia komprende Jezús nia domin ba ema sira no sai eskola dedikasaun ida saran an nian ba Maromka no ba maun-alin sira: sai santu! Husi ne'e moris ninia laran-manas ba klamar sira. Ita bele haree atitude saran an ne'e klaru liu iha nia loron ikus, ho moras leusemia agresiva. Nia la ta'uk, mai dehan: "Ha'u oferese terus hotu ne'ebé ha'u tenke sofre ba Na'i, ba Amu-Papa no ba Kreda, atu la halo Purgatóriu no bá loos Lalehan".




Reflesaun

Saida mak hatudu katak ha'u simu Jezús?

Orasaun no empeñu

"Foti sae, imi oin, odamatan sira, hamri'ik ba, odamatan antigu sira, no husik Liurai glória nian tama mai" (Salmu 24,7).




EUKARISTIA KATAK KSOLOK



Leitura Evanjellu: Jo 20,1-9

Indikasaun ba reflesaun



Ita to'o ona Páskua depoizde tuir Jezús iha ninia loron ikus sira moris nian: iha senákulu, iha to'o Oliveira, iha Krús atu saran moris mai ita. Sábadu mak loron triste isa, loron ida mamuk no nakukun mai ita mós. Evanjellu Páskua nian hahú husi limite ida-ne'e, husi kalan naukukun. João hakerek katak nakukun hela bainhira Maria husi Magdala bá iha rate. Iha li'ur nakukun, maibé liuliu iha feto ne'e nia fuan tanba lakon ema ida mesak ne'ebé komprende nia. Foin to'o iha rate, nia haree katak fatuk iha odamatan nakloe tiha ona. Nia la tama ida maibé halai kedas na Pedro no João hodi dehan ba sira: "Ema lori tiha ona Na'i husi rate". Sira halai kedas ba rate mamuk. Halai ida ne'ebé esprime dixípulu ida-idak ninia laran-susar, ita ida-idak ne'ebé buka Na'i. Ita mós tenke hahú hikas halai atu haklaken ksolok Na'i Moris-Hi'as nian. Dalaruma ita la'o neineik demais, karik todan tanba domin ba an rasik, tanba ta'uk atu namdoras no lakon buat ruma husi ita-nia an. Presiza koko fali atu halai no la'o ba hasoru Na'i. Ita labele taka an: Evanjellu mak moris-hi'as no moris foun. Ita tenke loke odamatan ho ksolok no domin ba Na'i Moris-Hi'as ne'ebé mai iha ita leet. Iha Eukaristia, partikularmente, mak ita moris fila fali ho modu intensu esperiénsia ne'ebé Apóstolu sira halo bainhira Nia hatudu an ba sira. Eukaristia mak haraik mai ita ksolok ne'ebé ita tenke lori ba ema seluk.

Sasin moris Ven. Carlo Acutis nian

Carlo la subar sá loos ninia ksolok nia hun. Iha kuartu iha kuadru boot ida Jezús nian no ema hotu bele haree. No nia konvida ninia kolega sira atu bá Missa hamutuk, atu rekonsilia an ho Maromak. Iha kadernu ida nia hakerek: «Laran-triste mak hateken ida ba an rasik, ksolok mak hateken dirije ba Maromak».

Iha uma, iha kolaboradór doméstiku naran Rajesh, induista, husi kasta Brama. Entre nia ho Carlo moris amizade profunda to'o pontu Rajesh konverte an no husu atu simu sakramentu sira. Rajesh haktuir: «Nia dehan mai ha'u katak ha'u sei haksolok liu se ha'u hakbesik ba Jezús. Ha'u husu Batizmu kristaun tanba nia mak hadaet no hamanas ha'u ho ninia fiar kle'an, ninia karidade no ninia pureza. Ha'u sempre konsidera nia la'ós ema baibain ida tanba mane ida foin-sa'e nune'e, furak loos no riku liu normalmente prefere halo moris oinseluk».



Reflesaun

Saida mak hapara ka halo ha'u neineik atu haklaken ksolok moris-hi'as nian?

Orasaun no empenhu

Hahí Maromak ba ninia hahalok sira, hahí Nia ba ninia kmanek sura-laek. Kriatura hotu fó glória ba Na'i. Aleluia!

(Salmu 150,2.6).

